



Äntwert vum Premierminister, vum Inneminister, vun der Verdeedegungsministesch a vun der Ministesch fir Mobilitéit an ëffentlech Aarbechten op d'parlamentaresch Fro n° 3005 vum 8. Oktober 2025 vum honorabelen Députéierten Tom Weidig

- 1. Goufe verdächtig Droneflich zënter Ufank vum Joer an der Géigend vu sensiblen Ariichtungen (Energieversuergung, Flughafen, Regierungsgebäier) zu Lëtzebuerg registréiert? Wa jo, wéivill a wat fir Erkenntneser ginn et iwwer Hierkonft an Zweck vun dëse Flich?**

Mir verweisen an dësem Kontext op d'Äntwert op d'parlamentaresch Fro n° 2760 vum 8. August 2025 vum honorabelen Deputéierten André BAULER iwwert suspekt Droneflich:

« Aucun cas de vol suspect n'a été signalé au Haut-Commissariat à la Protection nationale (HCPN) par un opérateur d'infrastructure critique depuis le début de l'année.

Une recherche manuelle effectuée dans le « Einsatzleitsystem » (ELS) de la Police a recensé, pour l'année 2025, un total de 39 appels relatifs à des vols de drones dont la majorité concernaient des survols de maisons privées, de jardins ou de champs dans le but d'observer le gibier. (...) Dans la plupart de ces interventions, la personne en possession du drone litigieux n'a pas pu être interceptée. »

Am Zäitraum no dëser parlamentarescher Fro konnten nach zwee weider Fäll duerch eng manuell Recherche an der Datebank vun der Police fonnt ginn déi der Police gemellt gi sinn. Den Dronepilot konnt an dëse Fäll net ugetraff ginn. Wärend de Feierlechkeeten am Kader vum Trounwiessel huet d'Police selwer de 4. Oktober 2025 zousätzlech dräi Verstéiss festgestallt wou se och intervenéiert ass, hei goufen zwou Drone saiséiert.

- 2. Iwwer wat fir technesch Systemer zur Detektioun an Identifikatioun vu verdächtigen Drone verfügt de Staat? Wéi eng Instanzen zu Lëtzebuerg hunn den Optrag respektiv d'Fäegkeet, dat ze maachen an ze mellen? Gëtt et eng Koordinatiounstell?**

An der Police ass et d'Unité Spéciale de la Police (USP), déi d'Material an déi technesch Kompetenzen huet, fir eenzel Drone lokal an deelweis och d'Piloten ze detektéieren, ze identifizéieren an ze lokaliséieren. Och d'Armée verfügt iwwer Systemer fir d'Detektioun an Identifikatioun vun Dronen. Spezifesch technesch Detailer zu de verwende Systemer kënnen aus Sécherheetsgrënn hei net genannt ginn.

Wat d'Meldungsflucht ugeet, bereet d'Europäesch Kommissioun, mat Hëllef vun der Europäescher Aviatiounssécherheetsagence, de Moment en Text vir, fir d'Reglement (EU) Nr. 376/2014 vum Europäesche Parlament an dem Rot vum 3. Abrëll 2014 iwwert d'Comptes rendus, d'Analysen an de Suivi vun Evenementer an der ziviller Loftfaart ofzeänneren.

- 3. Wéi gesäit d'Kooperatioun mat den Nopeschlänner, der NATO an der EU beim Informationsaustausch iwwer verdächtig Dronenaktivitéiten aus? Gëtt et gemeinsam Asazpläng fir d'Grenzregioun?**

Lëtzebuerg huet zwee Verrieder am "Informal Commission expert group on countering threats posed by drones" vun der europäescher Kommissioun wou den Austausch op europäeschem Niveau am ziville Beräich assuréiert gëtt: ee Member vun der Direction de l'aviation civile an ee vun der Police.



D'Dronenaktivitéite waren och um leschte Conseil JAI de 14. Oktober 2025 zu Lëtzebuerg abordéiert ginn.

4. Iwwer wat fir technesch Systemer zur Neutraliséierung vu verdächtige Dronen verfügt de Staat? Gëtt diesbezüglich en Ënnerschied tëscht deene verschiddenen Typen vun Dronen gemaach?

D'Police an d'Armée verfügen iwwer Neutralisatiounsmoyenen fir Dronen ze neutraliséieren. Aus Confidentialitéitsgrënn kënnen keng Detailler genannt ginn, em wéi eng Systemer et sech genau handelt.

5. Wéi eng Instanzen zu Lëtzebuerg hunn d'Exekutivgewalt, fir bei enger akuter Bedrohung duerch eng Dron anzuschreiden? Lait d'Kompetenz exklusiv bei der Police oder kann am Fall vun enger eskaléierender Gefor och d'Armée ageschalt ginn? Wéi gëtt d'Koordinatioun tëscht de verschiddenen Instanzen am Noutfall gereegelt? Ginn et do schonn intern Prozeduren, déi dat reegelen?

D'Police ass zoustänneg fir d'bannenzeg Sécherheet, de Schutz vu Persounen an Eegentum an assuréiert dës Missioun mat de legale Moyenen déi se huet. Doriwwer eraus kann och d'Armée requisitionéiert ginn.

Am Fall vun enger Bedrohung vun der Loftfaartsécherheet hunn d'Loftverkéierskontrollen vun der ANA, der Administration de la navigation aérienne, eng Prozedur en Place, déi "Clear the Sky" heescht. Dës besteet doranner, datt de Loftraum vun all konventionellem Loftverkéier geraumt gëtt. De Bedreier vum Fluchhafen, lux-Airport, huet och e Fluchhafen-Noutfallplang, deen eng operativ Entscheedungsketten enthält.

6. Ass et rechtlech méiglech, Dronen am Noutfall ze neutraliséieren? Wat sinn d'Kriterien, fir eng Dron dierfen ze neutraliséieren? A wéi engem gesetzleche Kader beweegt sech esou en Asaz? Plangt d'Regierung am Kontext vun den Debatten an Däitschland an an aneren EU-Länner, déi gesetzlech Grondlage fir d'Ofwier vu feindlechen Dronen ze präziséieren oder auszubauen? Wa jo, wat fir Ännerungen si virgesinn a wéi ass den Zäitplang?

Als legale Kader hält sech d'Police un d'Loi modifiée du 30 mai 2005 portant organisation de la gestion des ondes radioélectriques.

Wann eng Dron eng konkret Gefor fir d'national oder öffentlich Sécherheet duerstellt, kann d'Armée geruff gi fir zu der Protektioun vun Infrastrukture bäizetroen,

- op Requisition, wann d'Armée zum Beispill geruff gëtt fir Infrastrukturen ze schützen,
- oder direkt, wann d'Sécherheet vu militäreschen Infrastrukturen a Gefor ass.

De Besoin, de legale Kader z'iwwerschaffe fir en den aktuellen Herausforderungen unzepassen, gëtt am Moment vun den zoustännegen Instanzen analyséiert.



7. **Gëtt et national kritesch Infrastrukturen (z.B. Regierungsgebäier, Energieanlagen, militäresch Installatiounen asw.), déi aktuell scho mat permanente Stéiersystemer oder anere Schutztechnologien ausgerüst sinn, fir potenziell Dronenattacken ofzewieren?**

D'Regierung mécht keng Aussoen zu de Schutzmoossname vu kriteschen Infrastrukturen.

8. **Ass Lëtzebuerg an déi vun der EU geplangten „Dronemauer“ fir d'Iwwerwaachung an de Schutz vun den Aussegrenzen agebonnen?**

De Projet vun der „European Drone Defence Initiative“ (och bekannt ënnert dem initialen Numm „Dronemauer“) soll eng méi-schichteg an technologesch fortgeschratt 360° Verdeedegungskapazitéit bilden, déi Anti-Drone-Systemer fir Detektioun, Iwwerwaachung an Neutraliséierung integréiert, kombinéiert mat der Notzung vun Dronentechnologie fir Präzisiounsattacke géint Ziler um Buedem. De Projet gouf rezent den EU-Memberstaate presentéiert. D'Défense ënnersicht de Sujet aktuell am Detail a waart op weider Informatiounen vun der Europäescher Kommissioun. Lëtzebuerg ass als EU-Memberstaat an de Gespréicher ëm dëse Projet mat agebonnen. Eng méi aktiv Participatioun ass zu dësem Zäitpunkt net ausgeschloss.

Lëtzebuerg, de 7. November 2025.

De Premierminister,

(s.) Luc FRIEDEN